



---

Broj: 01,02,03,03/11-05-1-1303/18

Sarajevo, 2. 7. 2018.

### Izvještaj

#### s misije posmatranja predsjedničkih i parlamentarnih izbora u Turskoj –

**Istanbul, 24. juni 2018.**

Predsjedavajući Delegacije Parlamentarne skupštine Bosne i Hercegovine (PSBiH) u Parlamentarnoj skupštini Mediterana (PAM) Šemsudin Mehmedović i zamjenik predsjedavajućeg Delegacije PSBiH u PAM-u Mirsad Isaković boravili su od 23. do 26. juna 2018. u misiji posmatranja predsjedničkih i parlamentarnih izbora u Turskoj.

Na dan održavanja izbora 24. juna, predsjedavajući i zamjenik predsjedavajućeg Delegacije Parlamentarne skupštine BiH (PSBiH) u Parlamentarnoj skupštini Mediterana (PAM) Mehmedović i Isaković, kojima su se u okviru posmatračke misije PAM-a u Turskoj pridružili poslanici iz parlamenata Alžira, Maroka i Tunisa, obišli su ukupno devet biračkih mjesta u Istanbulu. Članovi naše delegacije razgovarali su s članovima biračkih odbora, koje su na svakom biračkom mjestu činila dva državna službenika i četiri predstavnika političkih stranaka. Također, posmatrači PAM-a imali su priliku da se sastanu i razmijene mišljenja s predstavnicima međunarodnih medija na dan održavanja izbora.

Tim posmatrača PAM-a, koji su dobili slobodan i nesmetan pristup biračkim mjestima, ocijenili su da se procedura, oprema i sve tehničke odredbe izbornog zakona poštuju, kako bi se garantirala efikasna identifikacija i registracija birača, kao i tajnost samog procesa glasanja. Biračka mjesta, koja je posmatrao tim PAM-a, otvarala su se na vrijeme i svi su pratili uobičajene procedure.

Od 16 miliona stanovnika u Istanbulu, prijavljenih glasača bilo je oko 10,5 miliona koji su glasali u tri distrikta najvećeg grada Turske. Iz Istanbula se u Veliku narodnu skupštinu Turske birao 101 poslanik od ukupno 600 parlamentaraca koliko broji najviša zakonodavna institucija u toj zemlji.

Predsjednički i parlamentarni izbori u Turskoj održani su u nedjelju, 24. juna 2018. na kojima je pobjedu proglasio aktuelni predsjednik te zemlje Recep Tayyip Erdogan, kao i njegova Stranka pravde i razvoja (AKP).

Posmatranju predsjedničkih i parlamentarnih izbora u Turskoj, osim predsjedavajućeg i zamjenika predsjedavajućeg Delegacije Parlamentarne skupštine BiH u Parlamentarnoj skupštini Mediterana Šemsudina Mehmedović i Mirsada Isakovića, prisustvovala su i Enida Mehmedovski, iz Sektora za međunarodne odnose i protokol Sekretarijata Parlamentarne skupštine BiH, i Amila Žujo, prevoditeljica u Sektoru za međunarodne odnose i protokol Sekretarijata Parlamentarne skupštine BiH.

Izveštaj pripremila:

Enida Mehmedovski

Izveštaj odobrio:

predsjedavajući Delegacije PSBiH u  
Parlamentarnoj skupštini Mediterana (PAM)

Šemsudin Mehmedović

Dostaviti:

- Kolegiju Doma naroda PSBiH
- Kolegiju Predstavničkog doma PSBiH
- Kolegiju Sekretarijata PSBiH
- Delegacija PSBiH u Parlamentarnoj skupštini Mediterana (PAM)
- Komisiji za vanjske poslove Predstavničkog doma PSBiH
- Komisiji za vanjske i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću PSBiH
- Sektoru za međunarodne odnose i protokol PSBiH

Kopija: Ministarstvo vanjskih poslova BiH